



REPUBLIKA E SHQIPËRISË

KËSHILLI I EMËRIMEVE NË DREJTËSI

V E N D I M I

Nr. 23, datë 04.09.2025

PËR PËRFUNDIMIN E PROCEDURËS SË VERIFIKIMIT TË KANDIDATURËS SË ZOTIT DENAR BIBA NË VENDIN VAKANT, PËR GJYQTAR NË GJYKATËN KUSHTETUESE, SHPALLUR NGA GJYKATA E LARTË MË DATË 11.12.2024

Këshilli i Emërimeve në Drejtësi, i përbërë nga:

Sokol Sadushi	Kryetar
Marjana Semini	Zëvendëskryetare
Ilir Toska	Anëtar
Alma Muça	Anëtare
Fuat Vjerdha	Anëtar
Enkela Vlora	Anëtare relatore
Etien Kapo	Anëtar
Irma Balli	Anëtare
Nafije Hasko	Anëtare

Asistuar nga sekretare Borana Liti, në prani të Avokatit të Popullit znj. Erinda Ballanca, në mungesë të përfaqësuesve të OPDAT, në mbledhjen e datës 04.09.2025, mori në shqyrtim çështjen që i përket:

KANDIDATIT:

Denar Biba

OBJEKTI:

Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë më datë 11.12.2024.

KËSHILLI I EMËRIMEVE NË DREJTËSI

Pasi dëgjoi relatimin e anëtares së KED, zonjës Enkela Bajo, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

Këshilli i Emërimeve në Drejtësi

Adresa Postare : **GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.**

Adresa Elektronike : **info@ked.gov.al, Numra telefonikë : +355 4 2257302**

1. Në zbatim të nenit 125 të Kushtetutës dhe të pikës 1 të nenit 7/ç të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, i ndryshuar, më datë 11.12.2024, Gjykata e Lartë ka shpallur hapjen e procedurës së aplikimeve për plotësimin e vendit vakant, të krijuar në Gjykatën Kushtetuese, pas deklarimit të mbarimit të mandatit të gjyqtarës Holta Zaçaj.

2. Në përfundim të afatit të procedurës së aplikimeve për shprehjen e interesit për kandidim, Gjykata e Lartë i ka dërguar Këshillit të Emërimeve në Drejtësi, listën e kandidatëve që kanë shprehur interes për këtë vend vakant në Gjykatën Kushtetuese, në të cilën përfshihej dhe kandidati Denar Biba, së bashku me dokumentacionin e paraqitur prej tyre, për përmbushjen e kushteve dhe kriterëve ligjore, të përcaktuara në nenin 7/a të ligjit nr. 8577/2000.

3. Në datë 15.01.2025, Këshilli i Emërimeve në Drejtësi (KED), realizoi procedurën e shortit për përzgjedhjen e anëtarit relator dhe të këshilltarit ligjor për këtë vakancë, sipas nenit 228 të ligjit nr. 115/2016 “Për organet e qeverisjes së sistemit të drejtësisë”, i ndryshuar, pikës 4 të vendimit nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar (në vijim vendimi nr. 4/2019 i KED) dhe vendimit të KED-së nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, i ndryshuar. Me anë të kësaj procedure, relatore për këtë vakancë u përzgjodh anëtarja Enkela Vlora, ndërsa këshilltare ligjore Iva Zemani.

4. Në datë 17.01.2025, kandidati Denar Biba u njoftua me shkrim, në rrugë elektronike për t’u paraqitur brenda tre ditëve në zyrën e posaçme të KED-së për tërheqjen e formularëve standard dhe të udhëzimeve të nevojshme për vijimin e procedurës së verifikimit të kandidimit të tij. Duke qenë se në aplikimin e kandidatit nuk ishte deklaruar një adresë elektronike për komunikim, për të mundësuar njoftimin e tij, sekretaria e KED bëri verifikimet e nevojshme duke komunikuar fillimisht në rrugë telefonike me kandidatin Denar Biba, e më tej pas konfirmimit të adresës elektronike prej tij, u mundësua njoftimi i kandidatit. Bashkëlidhur akteve gjendet deklarata për adresën postare, elektronike dhe kontaktet elektronike të kandidatit lëshuar në datë 20.01.2025 dhe dorëzuar pranë KED në datë 24.01.2025. Ky njoftim u krye në zbatim të pikës 22 të vendimit nr. 4/2019 të KED-së. Gjithashtu në zbatim të detyrimeve ligjore të parashikuara në ligjin nr. 115/2016 “Për organet e qeverisjes së sistemit të drejtësisë” i ndryshuar; si dhe Vendimin nr.4, datë 11.3.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe Inspektorit të Lartë të Drejtësisë”, i ndryshuar, kandidati Denar Biba i është njoftuar dhe emri i relatores dhe këshilltares së caktuar.

5. Në datën 17.01.2025, kandidati Denar Biba në rrugë elektronike, konfirmoi marrjen e njoftimit dhe deklaroi se nuk ka dijeni për shkaqe papajtueshmërie si me relatoren dhe këshilltaren.

6. Në datë 20.01.2025, kandidati Denar Biba, u paraqit pranë KED-së dhe tërhoqi për plotësim formularët standard të deklaramit dhe autorizimet e duhura për procedurën e aplikimit për plotësimin e vendit vakant, objekt i kësaj procedure verifikimi, midis të cilave edhe ato për deklarimin e pasurisë dhe interesave financiarë. Në datë 21.01.2025, kandidati është paraqitur pranë KED për dorëzimin e autorizimeve dhe deklarimeve përkatëse.

7. Përgjatë kësaj periudhe Këshilli i Emërimeve në Drejtësi ka zhvilluar korrespondencë të plotë me organet ligjzbatuese, ILDKPKI dhe institucionet ku kandidati ka qenë i punësuar si dhe me kandidatin për të kryer verifikimin e kritereve të pasurisë, integritetit dhe kritereve dhe kushteve të tjera ligjore.

8. Në datë 04.09.2025, kandidati Denar Biba ka depozituar personalisht pranë zyrës së Këshillit kërkesë për të ndërprerë procesin e kandidimit e cila është protokolluar me nr. 288 nga sekretaria e Këshillit. Kërkesa është e nënshkruar personalisht nga kandidati. Konkretisht kandidati ka parashtruar:

“Procesi i përzgjedhjes së kandidaturave për pozicionin vakant për anëtar në Gjykatën Kushtetuese zgjati më shumë nga ç'duhej, ndonëse pa dëshirën tuaj. Prej muajsh vijon filtrimi i kandidaturës sime, megjithëse informacionet nga organet e tjera ligjzbatuese që ndihmojnë procesin ju janë vënë tashmë në dispozicion. Unë gjithashtu iu jam përgjigjur me hollësi të gjitha pyetjeve që më keni drejtuar, për të mos lënë asnjë dyshim në vendimmarrjen tuaj.

Në datën 4 shtator ju keni caktuar mbledhjen e radhës dhe, në kuptim të respektimit të një procesi të rregullt ligjor, me siguri sërish nuk do ketë një vendim përfundimtar, në mënyrë që ju të nisni me pikëzimin dhe përzgjedhjen finale të atij kandidati, i cili do të jetë gjyqtari i ardhshëm i Gjykatës Kushtetuese.

Sa i takon këtij të fundit, duke qenë se bëhet fjalë për një vakancë të shpallur nga Gjykata e Lartë, unë vlerësoj se, nga momenti që në kandidim hyri edhe një anëtar i kësaj gjykate, kandidatura ime humbi valencën përkatëse.

Nga ana tjetër, gjatë këtyre 9 muajve proces seleksionues, interesat e mia profesionale kanë evoluar në drejtime të tjera. Procesi i anëtarësimit të Shqipërisë në BE është në një stad shumë të rëndësishëm dhe është shndërruar në përparësi absolute kombëtare. Si anëtar i trupës negociatore dhe drejtues kapitulli, kam obligime që nuk mund t'i tërheq zvarrë e, aq më pak, t'i le peng i një tjetër procesi, nga i cili, me gjasë, nuk do të dal fitues.

Për këto arsye objektive, me anë të kësaj shkrese, ju komunikoj vendimin tim për të ndërprerë procesin e kandidimit për anëtar të Gjykatës Kushtetuese”.

II. Vlerësimi i Këshillit të Emërimeve në Drejtësi

9. KED-ja, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga relatori i caktuar për ndjekjen e procedurave për vendin vakant në Gjykatën Kushtetuese të shpallur nga Gjykata e Lartë në datën 11.12.2024, vlerëson se duhet të procedojë me vendim për përfundimin e procedurës së verifikimit, të kandidatit Denar Biba.

10. Në zbatim të neneve 125 dhe 149/d të Kushtetutës së Republikës së Shqipërisë dhe të pikës 1 të nenit 7/c të ligjit nr. 8577, datë 10.2.2000 “*Për organizimin dhe funksionimin e Gjykatës Kushtetuese në Republikën e Shqipërisë*”, i ndryshuar (referuar në vijim si ligji nr. 8577/2000), Gjykata e Lartë në datën 11.12.2024, ka shpallur hapjen e procedurës së aplikimeve për plotësimin e vendit vakant, të krijuar në Gjykatën Kushtetuese, për shkak të mbarimit të mandatit të gjyqtarës Holta Zaçaj.

11. Në zbatim të nenit 7/c të ligjit nr. 8577/2000 dhe të nenit 234 e vijues të ligjit nr. 115/2016, pas dërgimit të listës së kandidatëve që kanë shprehur interes së bashku me dokumentacionin e paraqitur, për vendin vakant në Gjykatën Kushtetuese të shpallur të shpallur nga Gjykata e Lartë në datën 11.12.2024, KED ka filluar procedurën e verifikimit të kandidaturave për plotësimin e kushteve dhe kriterëve të kandidimit që parashikohen nga Kushtetuta dhe ligji.

12. Ligji nr. 8577/2000 dhe ligji nr. 115/2016 nuk parashikojnë në mënyrë të shprehur rastin e tërheqjes nga kandidimi dhe mënyrën e disponimit të KED-së në raste të tilla. Nga ana tjetër, ligji nr. 115/2016, në pikën 2 të nenit 229, parashikon se:

“2. Këshilli i Emërimeve në Drejtësi, për të siguruar zhvillimin e një procedure transparente, publike dhe bazuar në merita, me vendim, miraton rregulla më të detajuara për përzgjedhjen dhe pikëzimin e kandidatëve, duke përfshirë edhe rregullat për procedurën e verifikimit të pasurisë, integritetit dhe të së shkuarës profesionale dhe personale të tyre”.

13. Mbi bazën e këtij autorizimi ligjor, KED ka nxjerrë vendimin nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, i ndryshuar. Në pikat në pikat 8 dhe 31 të këtij vendimi parashikohet se:

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi”.

[...]

“31. Kur kandidati njofton tërheqjen nga kandidimi, relatori përgatit relacionin që përshkruan procedurën e zhvilluar dhe projekt-aktin mbi përfundimin e procedurës administrative të verifikimit të kandidatit të tërhequr, duke e dërguar menjëherë për shqyrtim në mbledhjen e Këshillit”.

14. KED-ja, në zbatim të dispozitave ligjore dhe nënligjore, të zbatueshme në rastin e tërheqjes nga kandidimi, vlerëson të rregullt procedurën e ndjekur deri tani për verifikimin e kandidaturës së kandidatit Denar Biba.

15. KED-ja vlerëson se, shprehja e interesit dhe kandidimit për plotësimin e vendeve vakante që krijohen në Gjykatën Kushtetuese është një e drejtë, e cila ushtrohet nga kandidatët ekskluzivisht mbi vullnetin individual të tyre, duke respektuar procedurat, kushtet dhe kriteret e kandidimit që parashikon Kushtetuta dhe ligji.

16. Në rast se personi që kandidon, në çdo kohë e gjendje të procedimit, shpreh vullnetin për të mos vijuar më tej me kandidimin për plotësimin e vendit vakant që krijohet në Gjykatën Kushtetuese, atëherë nuk ka më vend të vijojnë procedurat e verifikimit, vlerësimit, pikëzimit dhe renditjes së kandidaturës, të parashikuara nga ligji dhe aktet nënligjore të nxjerra në bazë e për zbatim të tyre.

PËR KËTO ARSYE:

Në mbështetje të pikës 1 të nenit 149/d të Kushtetutës, të 7/c të ligjit nr. 8577/2000, “*Për organizimin dhe funksionimin e Gjykatës Kushtetuese të Republikës së Shqipërisë*”, i ndryshuar, të pikës 3 të nenit 229 të ligjit nr. 115/2016, “*Për organet e qeverisjes së sistemit të drejtësisë*”, i ndryshuar, si edhe pikave 8, 31, 34 të vendimit të KED-së nr. 4, datë 11.03.2019, “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, i ndryshuar, Këshilli i Emërimeve në Drejtësi,

V E N D O S I:

1. Përfundimin e procedurës së verifikimit, vlerësimit, së kandidaturës të kandidatit Denar Biba, në vendin vakant për gjyqtar në Gjykatën Kushtetuese, shpallur nga Gjykata e Lartë në datën 11.12.2024, për shkak të tërheqjes së kandidatit nga kandidimi.
2. Në zbatim të nenit 238 të ligjit nr. 115/2016, ky vendim i njoftohet kandidatit Denar Biba.
3. Kandidati Denar Biba ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ANËTAR
Ilir TOSKA

Zv/KRYETARE
Marjana SEMINI

KRYETAR
Sokol SADUSHI

ANËTARE
Enkela VLORA

ANËTAR
Fuat VJERDHA

ANËTARE
Alma MUÇA

ANËTARE
Irma BALLI

ANËTAR
Etien KAPO

ANËTARE
Nafije HASKO